

Alkitab Buat Bocah Nampilin

Daniel ama Para Tahanan



Nyeng nulis: Edward Hughes

Nyeng bikin gambar: Jonathan Hay
Alastair Paterson

Nyeng nyocokin: Mary-Anne S.

Nyeng terjemahin: Matheus Nalih Ungin

Dibikin buat: Bible for Children
www.M1914.org

©2023 Bible for Children, Inc.

Perijinan: Enté boleh ngegandain atau nyetak ini cerita,
selama enté kagak ngejualnya.



Daniel ama tiga sohibnya netep di Israel. Satu ari seorang raja penggede dateng ke tempat mereka netep ama bakal ngebawa semua bocah laki nyeng pinter ke negerinya. Raja ini punya nama nyeng panjang -Nebukadnezar- ama dia netep di sebuah negeri nyeng jauh banget nyeng namanya Babel.



Semua anak laki sangat diperatiin dengan bae selama netep di Babel. Raja udah milih anak laki nyeng paling pinter ama nyeng paling ngetop dari setiap negeri di dunia. Dia udah punya ancang-ancang buat ngelatih mereka semua pake bahasa Babel biar mereka bisa jadi pembantunya dan bisa ngebantu buat ngeluasin kerajaannya.




Makanan di sono juga enak-enak. Anak bujang pada makan apa aja nyeng di makan raja juga. Tapi Daniel ama ketiga sohibnya kaga mau makan makanan itu sebab udah dikhususin buat berhala atau jurig. Daniel udah janji kalo dia kaga bakalan mau ngerjain apaan aja nyeng bisa ngebantah Allahnya. Allah Israel udah ngasih perintah bangsanya supaya kaga ngejalin hubungan sama berhala atawa jurig atawa juga allah nyeng palsu.



Daniel nanya ama orang nyeng punya tanggung jawab ama latihannya itu supaya kaga makan makanan nyeng dimakan raja. Kalo sang raja tau, dia bakalan marah banget. Tapi Allah bikin Daniel disenengin orang itu.



Dia akur-akur aja buat ngasih Daniel ama ketiga sohibnya satu cobaan. Buat sepuluh ari mereka cuman bakal makan sayur ama minum aer doang. Dan pada akhir ari nyeng ke sepuluh Daniel ama ketiga sohibnya keliatan lebih sehat daripada semua bujangan nyeng makan makanan raja. Lantas mereka ngikut ngelanjutin makan sayuran ama minum aer doang.




Daniel ama ketiga sohibnya ngehormatin Allah. Allah juga kesian ama mereka. Allah ngasih mereka elmu dan kebisaan dalem segala hal nyeng mereka pelajarin, dan Daniel dikasih kearifan biar bisa ngarti semua penerawangan masa depan.





Pas tiga taun disekolaan Babel,
semua anak bujang/bujangan
ngadep raja Nebukadnezar.
Dia nunjuk Daniel ama ketiga
sohibnya jadi nyeng paling hebat
dari semuanya. Sebenarnya raja
tau kalo Daniel punya banyak
kebijaksanaan daripada semua
orang bijak nyeng ada
dikerajaannya.



Satu malem, raja dapet mimpi jelek. Raja manggil tukang ramal, tukang ngimpi, ama tukang sihir supaya dateng dan bediri di depannya. Raja bilang, "Aku udah ngimpi, sebuah mimpi, dan aku pengen banget tau apa sih arti mimpiku itu."

Orang bijak ngejawab, "Ya raja, idup terus.

Bilang ama pembantumu soal semua mimpimu, dan kita bakalan bilang apa artinya dari mimpi itu."



Raja ngejawab "Kaga! Kamu kudu bilang sama aku soal ngimpi itu dan bilang juga apa artinya. Kalo kaga, kamu aku matiin dan rumahmu bakalan aku bakar! Tapi kalo kamu bilang soal mimpiku, dan apa artinya," Raja nerusin, "Kamu bakalan dapet hadiah, penghargaan ama bayaran nyeng paling bagus." Udah pasti, kaga ada seorang bijak nyeng bisa ngasih tau apa mimpi dari sang raja.



Ada satu orang bijak kerajaan bilang ama raja, "Kaga bakalan ada orang di dunia ini bisa ngerjain apa nyeng raja arepin. Cuman dewa nyeng bisa ngerjain kaya gitu, tapi mereka kaga ada di dunia ini." Raja marah banget. "Ancurin semua orang bijak nyeng ada di Babel!" perintah raja.



Pas wayahnya para prajurit dateng pada Daniel, dia bilang ama Ariokh, seorang panglima raja, "Ngapa emangnya raja pengen ngancurin semua orang bae nyeng ada?" Lantas Ariokh ngasih tau semua nyeng udah terjadi ama Daniel. Daniel lantas pegih ngadep raja. Dia minta waktu buat ngasih tau raja soal arti mimpinya.



Lantas Daniel balik ke rumahnya, dan bilang semua cerita itu ama sohibnya Sadrakh, Mesakh, dan Abednego. Daniel kaga tau ngimpi kaya apa ama apa artinya, tapi dia tau ada orang nyeng tau ama segalanya. Dan orang itu ya Allah. Lantas, Daniel ama sohib-sohibnya sembahyang.



Allah ngasih tau kepada Daniel soal mimpi itu ama artinya. Daniel bersyukur kepada Allah nyeng ada di Sorga, dan bilang, "Terpuji nama Tuhan selama-lamanya, buat kebijaksanaan ama semua kepunyaanNya." Daniel buru-buru ngadep raja dan bilang sama raja, "Ada Allah di sorga nyeng bisa ngebuka rahasia."

Dia ceritain sama raja soal ngimpi ama apa arti mimpinya.



Wayahnya raja Nebukadnezar ngedenger soal ngimpi ama apa artinya, dia sedeku disamping Daniel dan bilang, "Bener-bener Allahmu itu Allah dari semua allah, dan Tuhan dari semua raja, ama pembuka rahasia, waktu kamu ngungkapin rahasia ini." Lantas raja ngejadiin Daniel orang nyeng kesohor, dan ngasih banyak banget hadiah. Raja bikin dia jadi penguasa atas semua wilayah Babel, dan jadi kepala dari semua orang bijak nyeng ada di Babel.



Daniel ama Para Tahanan

Sebuah cerita dari perkataannya Tuhan, Alkitab

Ditemuin di

Daniel 1-2

"Palang pintu Firman Engkau ngasih terang."
Mazmur 119:130



Tamat



Ini cerita Alkitab nyeng nyeritain kita soal Tuhan kita nyeng keren, nyeng nyiptain kita ama pengen enté kenal Dia. Tuhan tau kita udah bikin hal-hal nyeng kaga bae, nyeng Dia sebut dosa. Hukuman dosa ya mati, tapi Tuhan sayang banget sama enté, Dia ngirim anaknya nyeng atu-atunya, Yesus, biar mati disalib dan dihukum karna dosa enté semua. Lantas Yesus idup dan balik lagi ke rumahnya ke Sorga. Kalo emang enté yakin ama Yesus dan minta biar Di maafin dosa-dosa enté, Dia bakalan ngelakuinnya! Dia bakalan dateng dan idup di dalem enté ini ari, dan enté bakalan idup ama Dia selamanya.

Kalo enté yakin ini kebenerannya, sautin ini ke Tuhan: Ya Yesus, ané percaya kalo Engkau itu Tuhan, dan berubah jadi manusia buat mati karna dosa ané, dan sekarang Engkau idup lagi. Tulung dateng kedalem idup ané sama maafin dosa-dosa ané, biar ané punya idup nyeng baru ini ari, dan entar bakalan pegih sama Engkau selamanya. Tulungin ané biar bisa nurutin Engkau dan idup buat Engkau ama anak Engkau. Amin.

Bacain Alkitab dan ngomong ke Tuhan tiap ari! Yohanes 3:16

